

**MESYUARAT PERTAMA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
17 APRIL 2020**

PERKARA : 5(B)(XVIII)15

**SOALAN BERTULIS OLEH AHLI KAWASAN TELOK BAHANG
YB. ZOLKIFLY BIN MD. LAZIM**

15. Masalah vandalisme harta kerajaan.

- (a) Apakah usaha Kerajaan Negeri dalam menyelesaikan masalah vandalisme terhadap infrastruktur milik kerajaan seperti lampu, lif, perabot, jalan raya dan seumpamanya?
- (b) Berikan statistik dari tahun 2008 hingga 2019 jumlah kerugian yang terpaksa ditanggung Kerajaan Negeri dalam menghadapi situasi ini.
- (c) Langkah pencegahan yang diambil.

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

15. (a) Kerajaan Negeri memandang serius terhadap masalah vandalisme yang melibatkan infrastruktur awam seperti perabot jalan, lampu, lif dan seumpamanya. Sehubungan itu, usaha yang diambil oleh Kerajaan Negeri dalam menangani permasalahan ini adalah seperti berikut:
- (i) Menjalankan kerjasama dengan badan bukan kerajaan (NGO) dan pihak Polis Diraja Malaysia (PDRM) dalam membuat rondaan di kawasan-kawasan yang sering dilaporkan berlakunya kegiatan vandalisme;
 - (ii) Meningkatkan pencahayaan di kawasan-kawasan lorong belakang/sisi yang telah dinaiktaraf dengan menyediakan lampu jalan dan pencahayaan untuk arca karikatur Marking George Town supaya

menjadikan kawasan tersebut lebih selamat dan dapat menarik tumpuan pelancong seterusnya dapat mengelak berlakunya aktiviti vandalisme di kawasan tersebut;

- (iii) Bekerjasama dengan pembekal-pembekal bahan infrastruktur supaya membuat kajian dan inovasi dalam mengeluarkan bahan yang lebih berkualiti tinggi dan boleh mengurangkan potensi berlakunya vandalisme;
 - (iv) Menggalakkan penglibatan dan kerjasama orang awam dalam memberi laporan mengenai kes vandalisme dalam bentuk aduan;
 - (v) Mengadakan kempen-kempen kesedaran mengenai tanggungjawab orang awam dalam membendung vandalisme; dan
 - (vi) Menasihatkan peniaga memasang *Closed Circuit Television (CCTV)* secara individu.
- (b) Anggaran jumlah kerugian yang terpaksa ditanggung oleh Kerajaan Negeri dari tahun 2008 hingga 2019 akibat aktiviti vandalisme adalah sebanyak **RM10,262,815.00**. Perincian anggaran mengikut tahun adalah seperti berikut :

Bil.	Tahun	Jumlah Kerugian (RM)
1	2008	335,338.00
2	2009	300,720.00
3	2010	314,296.00
4	2011	595,199.00
5	2012	558,766.00
6	2013	612,980.00
7	2014	1,535,643.00
8	2015	1,537,530.00
9	2016	1,013,305.00
10	2017	1,375,014.00
11	2018	1,484,064.00
12	2019	599,960.00
Jumlah Keseluruhan		10,262,815.00

- (c) Langkah pencegahan yang dilaksanakan oleh Kerajaan Negeri dalam menyelesaikan masalah vandalisme ini adalah seperti berikut :

Bil	Jenis Infrastruktur	Langkah Pencegahan
1	Lampu Jalan / Lampu Isyarat / Lif	(i) Mensyaratkan supaya pemasangan sistem lampu jalan dan lampu isyarat adalah dari jenis bahan atau alat yang berkualiti, tahan lasak dan yang mendapat perakuan SIRIM dan <i>Electrical Meterial Approve List</i> (EMAL) daripada Jabatan Kerja Raya (JKR). (ii) Melakukan penambahbaikan ke atas rekabentuk kotak kawalan dan tiang lampu jalan dan lampu isyarat bagi meningkatkan ketahanan dan menyukarkan kegiatan vandalisme dilakukan. (iii) Menukar jenis kabel lampu jalan yang digunakan iaitu kabel jenis <i>Copper</i> ditukar kepada kabel jenis Aluminium bagi mengelakkan kecurian kabel. (iv) Menggunakan bahan/ <i>material</i> yang tidak mudah calar dan rosak.
2	Perabot jalan	(i) Membuat perubahan pada rekabentuk papan tanda kepada rekabentuk yang lebih sesuai dan kurang potensi vandalisme. (ii) Menggunakan bahan / <i>material</i> yang lebih tahan lasak dan berkualiti tinggi. (iii) Memasang perabot jalan seperti papan tanda nama jalan dan cermin cembung di kawasan yang cerah dan tumpuan orang ramai.

3	Alat mainan/ perabot taman	<ul style="list-style-type: none"> (i) Mensyaratkan pemasangan alat mainan/ perabot taman melalui permohonan Pelan Landskap dari jenis yang berkualiti dan yang mendapat perakuan SIRIM. (ii) Memasang papan tanda amaran/ pemberitahuan tatacara penggunaan alat mainan. (iii) Menggunakan bahan/ <i>material</i> yang tahan lasak.
---	-------------------------------	-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------

Selain itu, Kerajaan Negeri juga mempunyai beberapa alternatif lain bagi membantu menyelesaikan masalah vandalisme terhadap infrastruktur milik kerajaan seperti berikut:

- (i) Membuat rondaan dan pemantauan berkala untuk pemeriksaan aset di lokasi tumpuan kes vandalisme;
- (ii) Pemasangan kamera CCTV di lokasi-lokasi *hot-spot* jenayah termasuk vandalisme;
- (iii) Menasihati peniaga-peniaga barang lusuh agar tidak membeli barangan milik kerajaan daripada pihak yang tidak diketahui;
- (iv) Mengambil tindakan penguatkuasaan terhadap pihak yang melakukan vandalisme seperti mendenda dan penangkapan termasuk membuat laporan polis; dan
- (v) Menggalakkan penglibatan penjaja dalam kawalan keselamatan.